



REPUBLIKA E SHQIPËRISË

## KËSHILLI KOMBËTAR I UJIT

Nr. 1640 prot.

Tiranë më, 6.10 2022

### V E N D I M

Nr. 3, datë 28.09.2022

### PËR

### MIRATIMIN PARAPRAK, TË ZONËS, DISTANCËS DHE GJERËSISË SË BRIGJEVE TË BURIMEVE UJORE

Në mbështetje të shkronjës “dh”, të pikës 2, të nenit 8, të ligjit nr.111/2012, “Për menaxhimin e integruar të burimeve ujore”, të ndryshuar, të paragrafit “vii”, të shkronjës “b”, të pikës 1, të kreut III, të vendimit nr.221, datë 26.4.2018, të Këshillit të Ministrave, “Për organizimin dhe funksionimin e Agjencisë së Menaxhimit të Burimeve Ujore”, të ndryshuar, me propozimin e Agjencisë së Menaxhimit të Burimeve Ujore, Këshilli Kombëtar i Ujit

### V E N D O S I:

#### I. DISPOZITA TË PËRGJITHSHME

##### 1. Objekt i këtij vendimi është:

- a) Përcaktimi i kriterëve të përgjithshme dhe të posaçme për identifikimin e zonës, distancës dhe gjerësisë së bregut të burimit ujqor, konkretisht të:
  - i. Brigjeve përgjatë detit;
  - ii. Brigjeve në liqene, rezervuarë natyrorë apo artificialë, laguna, pellgje me ujë, duke përfshirë këtu liqenet, rezervuarët ujqorë, natyrorë apo artificialë;
  - iii. Brigjeve përgjatë lumenjve dhe përrenjve;

iv. Brigjeve përgjatë kanaleve artificiale.

b) Procedurat e përcaktimit të hartave të brigjeve.

2. Në këtë vendim termat e mëposhtëm kanë këto kuptime:

a) **“Shtrati i burimit ujqor”** është terreni natyror ose artificial, nëpër të cilin, përherë apo përkohësisht, rrjedh ose qëndron uji.

b) **“Zonë e bregut të burimit ujqor”** është hapësira tokësore nga brinja e sipërme e shtratit të burimit ujqor që shtrihet në drejtim të tokës sipas gjerësisë të përcaktuar në bazë të kriterëve të përgjithshme e të posaçme.

c) **“Gjerësi e bregut”** është gjerësia e hapësirës tokësore nga brinja e sipërme e shtratit të burimit ujqor në drejtim të tokës.

ç) **“Seksion i sistemuar”** është ajo pjesë e një trupi ujqor në të cilin janë kryer ndërhyrje infrastrukturore hidroteknike të nevojshme për sistemimin e ujërave natyrore ose artificiale si edhe për mbrojtjen e territorit nga këto ujëra, me veshje dhe/ose riprofilim të ndryshëm nga gjendja natyrore e cila siguron kalimin e plotës maksimale të llogaritur.

d) **“Vijë bregdetare”** ose vija e bregdetit është vija që formon kufirin midis bregdetit (tokës) dhe zonës së bregut.

dh) **“Vijë ujore”** (shoreline) ose vijë e bregut të trupit ujqor, është kufiri ujë-tokë.

## II. KRITERET E PËRGJITHSHME PËR PËRCAKTIMIN E ZONËS, DISTANCËS DHE GJERËSISË SË BREGUT TË BURIMIT UJQOR

3. Zona, distanca dhe gjerësia e bregut të burimit ujqor, përcaktohet mbi bazën e këtyre kriterëve të përgjithshme, si më poshtë:

a) tipologjia e burimit ujqor (i rrjedhshëm apo i qëndrueshëm);

b) ruajtja e ekosistemeve;

- c) sigurimi i vazhdimësisë së rrjedhës së trupave ujore gjatë plotave maksimale;
- ç) mbrojtja nga uji;
- d) morfologjia e brigjeve;
- dh) deluvionet dhe aluvionet e depozituara në vite përgjatë burimit ujor;
- e) pjerrësia e shtratit të burimit ujor;
- ë) pjerrësia e brigjeve;
- f) infrastruktura e transportit rrugor, hekurudhor, e ujitjes dhe kullimit, argjinaturat dhe veprat mbrojtëse, portet, të cilat kanë ndryshuar rrënjësisht karakterin e bregut në krahasim me atë natyror;
- g) dokumentet e planifikimit dhe zhvillimit të territorit;
- gj) garantimin e zhvillimit të qëndrueshëm të zonës bregdetare në harmoni me nevojat për zhvillim urban, si dhe me veprimtaritë ekonomike dhe sociale që zhvillohen ose kanë ndikim mbi të.

### III. KRITERET E POSAÇME PËR PËRCAKTIMIN E ZONËS, DISTANCËS DHE GJERËSISË SË BREGUT SIPAS LLOJEVE TË BURIMEVE UJORE

4. Zona e bregut të detit është hapësira që krijohet ndërmjet kufirit ujëtokë (niveli i ujit të detit në baticë, referuar VKM nr.1018, datë 16.12.2020) dhe vijës bregdetare dhe ku çdo ekosistem bregdetar natyror përfshihet në këtë hapësirë. Përgjithësisht kjo zonë është e thatë ku valët e detit arrijnë vetëm gjatë stuhive.

Vija bregdetare (ose e bregdetit), e cila është vija që formon kufirin midis bregdetit (tokës) dhe zonës së bregut, shënohet me fillimin e bimësisë së përhershme ose kur ka një ndryshim të dukshëm në morfologjinë e nënshtresave (substratit) ose formës së tokës (p.sh. nga një plazh relativisht i sheshtë në duna kodrinore), me përjashtim të rasteve si më poshtë:

- a) Kur në zonën e bregut të detit ka seksione të sistemuara, janë ngritur objekte publike të infrastrukturës së transportit (rrugë, shëtitore, etj.) apo të infrastrukturës së mbrojtjes përgjatë bregut nga proceset natyrore detare, vija bregdetare është kufiri i shtrirjes së veprës publike në drejtim të detit;
- b) Në rastin e porteve detare, zona e bregut të detit konsiderohet territori

i tij sipas planeve të përgjithshme vendore (PPV), ose planeve të detajuara për zonat me rëndësi kombëtare, ose vendimeve të KKT-së për shpalljen e zonave të rëndësisë kombëtare;

- c) Në rastet kur planet e përgjithshme vendore (PPV) apo planet e detajuara për zonat me rëndësi kombëtare (PDZRK), të miratuara sipas legjislacionit sektorial në fuqi, kanë përcaktuar vijën kufi deri ku lejohet zhvillimi i territorit (parashikuar ndërtime) dhe kjo vijë përkon me kriteret e vijës bregdetare sipas këtij vendimi, atëherë ajo vijë do të konsiderohet kufiri i zonës së bregut të detit në drejtim të tokës (përveç seksioneve të sistemuara për të cilat zbatohen parashikimet në germën a) të pikës 4). Në të kundërt dokumentet duhet t'i nënshtrohen rishikimit në ato territore ku vija nuk përkon me kriteret e vijës bregdetare;
  - ç) Në rastet kur perspektiva e zhvillimit të përcaktuar në PPV-të apo PDZRK-të nuk parashikon zhvillime në zonën e bregut të detit dhe kjo krijon mundësinë e zbatimit të nenit 8 të Ligjit nr.10 234, datë 18.2.2010 "Për aderimin e Republikës së Shqipërisë në protokollin "Për menaxhimin e integruar të zonës bregdetare në Mesdhe" të Konventës së Barcelonës "Për mbrojtjen e mjedisit detar dhe të rajoneve bregdetare të Mesdheut", atëherë zona e bregut të detit do jetë jo më pak se 100 metra në gjerësi;
  - d) Në rastin e brigjeve shkëmbore të thepisura, me pjerrësi të konsiderueshme (më shumë se 70°) që përfundojnë drejtpërdrejtë në sipërfaqen e detit, sipërfaqja e shpatit të pjerrët së bashku me zonën e sipërme (përtej shpatit në drejtim të tokës), e cila është e ndikuar nga proceset bregdetare, konsiderohet zonë e bregut të detit;
  - dh) Kur vija kufi e bregut të detit përkon me kufirin natyror të lagunës, zona, distanca dhe gjerësia e bregut detar është dinamike dhe ndjek ndryshimin e regjimit të kufirit të lagunës. Në këtë rast toka e përftuar nga tërheqja e ujit ose nga përparimi i tokës në drejtim të ujit, konsiderohet si zonë e bregut të detit;
  - e) Në rastin e deltave të lumenjve, limaneve detare dhe ngushticave, si pjesë e ujërave të brendshme detare, vija bregdetare i nënshtrohet kushteve dhe kriterëve për zonën e bregut të detit.
5. Në liqene, rezervuarë, pellgje me ujë, natyrorë apo artificialë, laguna, zona dhe gjerësia e bregut është hapësira tokësore e krijuar nga vija ujore tek vija e krijuar nga gjurma e lënë nga uji në vite gjatë niveleve maksimale, në të gjithë perimetrin e trupit uJOR (duke krijuar aluvione

- apo zona të pa gjelbëruara me bimësinë karakteristike të përhershme të brezit të tokës), me përjashtim të rasteve si më poshtë:
- a) Në rastin kur në zonën e bregut të këtyre trupave ujorë ka seksione të sistemuara, ku janë ngritur objekte publike të infrastrukturës së transportit (rrugë, shëtitore, etj.) apo të infrastrukturës së mbrojtjes nga proceset natyrore, zona dhe gjerësia e bregut ka kufi, kufirin e shtrirjes së veprës publike në drejtim të trupit ujor;
  - b) Në rastet kur planet e përgjithshme vendore (PPV) apo planet e detajuara për zonat me rëndësi kombëtare (PDZRK) të miratuara sipas legjislacionit sektorial në fuqi kanë përcaktuar vijën kufi deri ku lejohet zhvillimi i territorit (parashikuar ndërtime) dhe kjo vijë përkon me kriteret e zonës, distancës dhe gjerësisë së bregut, atëherë ajo vijë do të konsiderohet kufiri i zonës së bregut në drejtim të tokës (përveç seksioneve të sistemuara për të cilat zbatohen parashikimet në germën a) të pikës 5). Në të kundërt dokumentet duhet t'i nënshtrohen rishikimit të plotë ose të pjesshëm në ato territore ku vija nuk përkon me kriteret e vijës së bregut për këto trupa ujorë.
  - c) Në rastin e rezervuarëve artificialë të ujitjes, për nivel maksimal të gjurmës, duhet konsideruar niveli (perimetri) maksimal, që përcaktohet në projektin e ndërtimit të rezervuarit si dhe kushtëzimet e mundshme në projekt (nëse ka), mbi këtë nivel maksimal.
6. Zona, distanca dhe gjerësia e bregut përgjatë lumenjve dhe përrenjve përcaktohen si më poshtë:
- a) Në lumenjtë apo përrenjtë ku pjerrësia e profilit gjatësor të shtratit është më e madhe se 10%, zona, distanca dhe gjerësia e bregut është nga vija ujore deri në vijën e krijuar nga gjurma e plotës maksimale të ujit me siguri 1 herë në 100 vjet ( $P=1\%$ ).
  - b) Në lumenjtë apo përrenjtë ku pjerrësia e profilit gjatësor të shtratit është më e madhe se 4% deri në 10%, zona, distanca dhe gjerësia e bregut është 5m për pjerrësinë 4% dhe 2m për pjerrësinë 10% në plan, nga vija ujore deri në vijën e krijuar nga gjurma e plotës maksimale të ujit sipas prurjes mesatare shumëvjeçare. Për vlera të ndërmjetme përllogaritja bëhet me interpolim.
  - c) Në lumenjtë apo përrenjtë ku pjerrësia e profilit gjatësor të shtratit është 2% deri 4%, zona, distanca dhe gjerësia e bregut është 25m për pjerrësinë 2% dhe 5m për pjerrësinë 4% në plan nga vija ujore deri në vijën e krijuar nga gjurma e plotës maksimale të ujit sipas prurjes

mesatare shumëvjeçare. Për vlera të ndërmjetme përlllogaritja bëhet me interpolim.

- ç) Në lumenjtë e përrenjtë ku pjerrësia e profilit gjatësor të shtratit është më e vogël se 2%, zona, distanca dhe gjerësia e bregut është 100m për pjerrësinë 0% dhe 25m në plan për pjerrësinë 2%, nga vija ujore deri në vijën e krijuar nga gjurma e plotës maksimale të ujit sipas prurjes mesatare shumëvjeçare. Për vlera të ndërmjetme përlllogaritja bëhet me interpolim.
- d) Në lumenjtë, përrenjtë që kalojnë brenda zonave të urbanizuara, zona distanca dhe gjerësia e bregut është hapësira tokësore që formohet ndërmjet nivelit maksimal të ujit të seksionit tërthor dhe veprave publike apo atyre që janë në përputhje me dokumentet e planifikimit vendor, të miratuara.
- dh) Në lumenjtë e përrenjtë, shtretërit dhe/ose brigjet e të cilëve janë mbrojtur me argjinaturë dhe/ose strukturë gjatësore e tërthore mbrojtëse apo kanë seksione të sistemuara, zona, distanca dhe gjerësia e bregut është hapësira tokësore me ose pa ujë që krijohet ndërmjet argjinaturave, strukturave mbrojtëse, seksioneve të sistemuara dhe vijës ujore.
7. Në kanalet artificialë, zona, distanca dhe gjerësia e bregut është hapësira që krijohet nga vija ujore deri në kuotën e sipërme të kanalit (skarpatës së kanalit). Në rastet kur ka plane të përgjithshme vendore (PPV) të miratuara sipas legjislacionit sektorial në fuqi, zona dhe gjerësia e bregut është sipas përcaktimeve të planit.
8. Për raste të veçanta të papërcaktuara më sipër apo që mund të rezultojnë nga ndërthurje të parashikimeve të mësipërme, janë organet e menaxhimit të burimeve ujore që interpretojnë zonën, distancën dhe gjerësinë e bregut.

#### IV. DISPOZITA KALIMTARE

9. Ngarkohet Agjencia e Menaxhimit të Burimeve Ujore për ndjekjen e procedurës për miratimin e këtij vendimi në Këshillin e Ministrave.

10. Ngarkohet Agjencia e Menaxhimit të Burimeve Ujore për ndjekjen e procedurave për përcaktimin e hartave të brigjeve dhe miratimin rast pas rasti në KKU dhe KKT.
11. Pas miratimit në Këshillin e Ministrave, për zbatimin e aktit të ngarkohen Agjencia e Menaxhimit të Burimeve Ujore, Agjencia Kombëtare e Planifikimit të Territorit, Agjencia e Zhvillimit të Territorit, Agjencia Kombëtare e Bregdetit, Njësitë e Vetëqeverisjes Vendore.

Ky vendim hyn në fuqi menjëherë.

**ZËVENDËSKRYEMINISTRI**

**BELINDA BALLUKU**

